

# INUIT ATAQATIGIIT

## INATSISARTUNI



23. august 2016

UPA 2016/47

(Naqqiut)

**(Siunnersuut 13. februar 2016-imi ullulerneqarsimasoq taarserpaa,  
siunnersuuteqartoq allannguuteqarpoq)**

Inatsisartut Suleriaasianni § 33 imm. 1 naapertorlugu aalajangiiffigisassatut siunnersuut matumuuna saqqummiuppara:

**Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiitaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiitaliarsuup nalilersussavaa, suleriaatsit sunniuteqarluarnerusut pilersinnissaannut immikkoortortaqarfíllu suliassaqarfíllu (sektorit) akimorlugit suleqatigiinnerup pitsangorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiitaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiitaliarsuaq assigiinngissitaartuneersunit ilalius-sanik sulisitaqassaaq, sulininilu ukiut marluk iluanni naammassisssallugu. Tamatuma kingorna ataatsimiitaliarsuup innersuussutai Inatsisartuni politikkikkut suliarineqassapput.**

(Inatsisartunut ilaasortat, Múte B. Egede Inuit Ataqatigiit)

### Tunngavilersuut

Inuaqatigiit allaffissorfigineqarnerisa annertunaarneqarsimanerat aammalu pisortat namminersortunut naleqqiullugu allaffissornerisa initualaarnerat oqaatigineqartualersimapput. Tamakkalu saniatigut aaqqissugaanitta nunat avannarlernisut aaqqissugaanera isornartorsi neqartarpooq, massa nunat avannarliit inuttussutsimikkut, nunat atortulersugaanerisigut ilusaasigullu uagutsinniit allaanerulluinartut. Tamakkalu pitsangoriaasissanut allanngut-tisanullu suli periarfissaqartoq isumaqalersippaatigut.

Akerliatigulli inatsisit ingerlatsinermut tunngasut malitagut allanngujuissutsimik aaqqissuus-samullu tatiginnissinnaanitsinnik kinguneqarmata puigussanngilarput. Taamatuttaaq nunanut millionilippassuarnut inulinnut naleqqiullugu innuttaasunut 56.000-iusunut inatsimmut piareersaatit sukkaneruneq ajornerat puigussanngilarput.

Allaffissornerput pillugu politikkikkut oqallittuarnerput kinguneqartittariaqalerparput. Atagu isummersuutinik allanik oqallinnitsinni aallaavigisinnaasatsinnik periarta. Pisaq ima piuminaatsigivoq sukumiisumik suliareeqaartinnagu aalajangiivigisinnaanatigu – suliassamullu tassunga ataatsimiitaliarsuaq tulluartuuvoq. Isumarput naapertorlugu ataatsimiitaliarsuaq assigiinngissitaartunik inuttaqartariaqarpoq allaffissornerullu avataaneersunit aamma ilaasortaqartariaqarluni. Ullut tamarluinnaasa allaffinni sulisorpassuit ataaqqigaluarlutigit,

namminneq suliamik iluanni eqqarsaatnik nutaanik takujuminaatsitsisinnapput. Assersuutigalugu naalakkersuisoqarfimmi pisortasup suliaqarfimmi siunissami atorunnaarsinneqarnissaanik allatorluunnarluunniit aaqqissuunneqarnissaanik eqqarsarnissaq ajornakusoortissavaa. Tamatuma saniatigut ataatsimiititaliarsuup assigiinngissitaartumik inuttalimmik ilaliussamik sulisitaqarnissaa, følgegruppeqarnissaa, takorlooparput. Atorfilittaasinnaapput, ilisimatuit, politikkikkut partiit, ingerlatsivinni pisortat, ilinniagaqartut inuillu allat nutaanik pilersitsisinnasut. Suliassap isumaginissaa ukiunit marlunniit sivilisunerusariaqanngilaq, taamaasillunilu ataatsimiititaliarsuaq 2018-imi ukiakkut ataatsimiinnermi isumaliutissiisummik saqqummiussisinnaassaaq.

### **Pisortanut aningaasatigut allaffissornikkullu kingunerisassat**

Suliassat aalajangersarerat ataatsimiititaliarsuarmilu ilaliussatullu sulisitassap ilaasortasaanik toqqaanissaq aningaasaliissutaareersut iluanni isumagineqarsinnaapput. Ataatsimiititaliarsuup allaffissorneranut siunnersorterpassuit avaataaniittut arlaat suliakkersinnaavarput. Tamanna soorunami akisunerulersitsissaaq, taamaattorli suliap ingerlanerani nutaanik eqqarsaatersornissamut peqataasinnaapput. Ataatsimiititaliarsuarmut aningaasartuutit ukiuni marlunni ukiumut 2 mio. kr.-it naammassapput.

### **Namminersorluni inuussutissarsiuteqarnermut aningaasatigut allaffissornikkullu kingunerisassat**

Piffissaq qaninnej eqqarsaatigalugu soqanngilaq. Piffissaq ungasinnerusoq eqqarsaatigalugu allaffissorneq eqaannerusumik aaqqissuussaq anguneqarsinnaassaaq, tamannalu namminersortunut aamma iluaqutaasinnaavoq.

### **Innuttaasunut aningaasatigut allaffissornikkullu kingunerisassat**

Piffissaq qaninnej eqqarsaatigalugu soqanngilaq. Piffissaq ungasinnerusoq eqqarsaatigalugu allaffissorneq eqaannerusumik aaqqissuussaq anguneqarsinnaassaaq, tamannalu innuttaasunut aamma iluaqutaasinnaavoq